

সনেট-পঞ্চাশৎ

ফাল্গুন, ১৯১৩।



সনেট-পঞ্চাশৎ

শ্রীপ্রমথ চৌধুরী

কলিকাতা - ১৩ নং শিবনারায়ণ দাসের লেনস্থিত
সিক্কেস্বর মেসিন প্রেস হইতে
শ্রীঅবিনাশচন্দ্র মণ্ডল দ্বারা মুদ্রিত ও প্রকাশিত।

সনেট

পেত্রার্কী-চরণে ধরি করি ছন্দোবন্ধ,
যাঁহার প্রতিভা মর্ত্যে সনেটে সাকার।
একমাত্র তাঁরে গুরু করেছি স্বীকার,
গুরুশিষ্যে নাহি কিন্তু সাক্ষাৎ সম্বন্ধ !

নীরব কবিও ভাল, মন্দ শুধু অন্ধ।
বাণী যার মনশ্চক্ষে না ধরে আকার,
তাহার কবিত্ব শুধু মনের বিকার,
এ কথা পণ্ডিতে বোঝে, মূর্খে লাগে ধন্ধ
ভালবাসি সনেটের কঠিন বন্ধন,
শিল্পী যাহে মুক্তি লভে, অপরে ক্রন্দন ॥

✓ ইতালীর ছাঁচে ঢেলে বাঙ্গালীর ছন্দ,
গড়িয়া তুলিতে চাই স্বরূপ সনেট।
কিঞ্চিৎ থাকিবে তাহে বিজাতীয় গন্ধ,—
সরস্বতী দেখা দিবে পরিয়া বনেট ! ✓

ভাষ

পদধূলি দেহ মোরে, মহাকবি ভাষ !
ভারতের নাটকের আদিম আচার্য্য !
ধন্য হব তব কাব্য করি শিরোধার্য্য,
পত্রে পত্রে স্ফূরে যার বালাক আভাস
শুদ্ধ স্বরে গেয়েছিলে প্রসন্ন বিভাস,
পরিষদ ছিল তব মহাপ্রাণ আর্ষ্য ।
সে যুগের কবিমুখে ছিল না উচ্চার্য্য
বৃন্দাবনী প্রণয়ের গদগদ ভাষ ॥

স্বাধ্যায়-পবিত্র তব শূর-মুখ-বাণী ।
সরাগিণী অরোগিণী তব বীণাপানি ॥

তব কাব্য গৌরবের ধরে ইতিহাস ।
তুমি জানো সমরস বীর ও করুণ ।
সে শুধু কাতর, যার নয়নে বরুণ ।
তোমার নাটকে তাই জ্বলে পরিহাস ॥

জয়দেব

ললিত লবঙ্গলতা দুলায় পবনে ।
বর্ণে গন্ধে মাখামাখি, বসন্তে অনঙ্গে ।
নূপুর-ঝঙ্কারে আর গীতের তরঙ্গে,
ইন্দ্রিয় অবশ হয় তব কুঞ্জবনে ॥

উন্মদ মদনরাগ জাগালে যৌবনে,
রতিমত্তে কবিগুরু দীক্ষা দিলে বঙ্গে ।
রণক্ষত-চিহ্ন তাই অবলার অঙ্গে,
পৌরুষের পরিচয় আশ্লেষে চুম্বনে ॥

পাণির চাতুরী হল নীবীর মোচন ।
বাণীর চাতুরী কান্ত কোমল বচন ॥

আদিরসে দেশ ভাসে, অজয়ে জোয়ার !
ডাকো কল্কি, ম্লেচ্ছ আসে, করে করবাল,
ধূমকেতু-কেতু সম উজ্জ্বল করাল,
বঙ্গভূমি পদে দলে তুরূক্ষ সোয়ার !

ভর্তৃহরি

যোগী তুমি, ভোগী তুমি, তুমি রাজকবি ;
দেখেছ কখনো বিশ্ব শুধু নারীময়,
আবার দেখেছ বিশ্ব শুধু ব্রহ্মময়,
স্বর্ণে গৈরিকে আঁকে। সেই দুই ছবি ॥

ক্ষণিকের জ্যোতিকণা জানো শশিরবি,
বিশ্বরূপে মুগ্ধ তবু, সৌন্দর্য্যে তন্ময় ।
অসীম আঁধার-মগ্ন অনন্ত সময়
আত্মজ্যোতি-দীপালোকে শূন্য দেখ সবি ॥

নাস্তিকের শিরোমণি, আস্তিকের রাজা !
তব ধর্ম্ম মনোরাজ্যে বহুরূপী সাজা ॥

নাহি জ্ঞান কারে বলে ভয় কিম্বা আশা ।
ভুক্তি মুক্তি তোমা কাছে সমান অসার ।
সত্য শুধু মানবের অনন্ত পিপাসা,—
রত্ন দিয়ে তাই গাঁথো বৈরাগ্যের হার !

চোরকবি

জ্বলন্ত অঙ্গার, চোর ! তোর প্রতি শ্লোক,
দেহ আর মন যাহে একত্র গলিয়া,
হয়েছে পুষ্পিত, রূপে মর্ত্য উজলিয়া,—
কামনার অগ্নিবর্ণ রক্তাক্ত অশোক !
অশুভদর্শন যার কুহকী আলোক,
চিতাগ্নির শিখাসম হতাশে জ্বলিয়া,
মরণের ধূত্রদেহ চরণে দলিয়া,
রক্তসন্ধ্যারূপে রাজে, ছেয়ে কাব্যলোক ॥

সেই রক্তপুষ্পে করি শক্তি-আরাধনা,
করেছিলে মশানেতে নায়িকা-সাধনা ।
দিয়েছিল দেখা বিশ্ব বিদ্যারূপ ধরি',
কনকচম্পকদামে সর্বাস্র আবরি,
স্বপ্নোথিতা, শিথিলাঙ্গী, বিলোলকবরী,
প্রমাদের রাশিসম অবিদ্যা-সুন্দরী !

বসন্তসেনা

তুমি নও রত্নাবলী, কিম্বা মালবিকা,
রাজোদ্যানে বৃত্তচ্যুত শুভ্র শেফালিকা ।
অনাঘ্রাত পুষ্প নও, আশ্রমবালিকা,—
বিলাসের পণ্য ছিলে, ফুলের মালিকা ॥

রঙ্গালয় নয় তব পুষ্পের বাটিকা,
অভিনয় কর নাই প্রণয়-নাটিকা ।
তব আলো ঘিরে ছিল পাপ-কুজ্জাটিকা,—
ধরণী জেনেছ তুমি মৃৎ-শকটিকা !

নিষ্কণ্টক ফুলশরে হওনি ব্যথিতা ।
বরেছিলে শরশয্যা, ধরায় পতিতা ॥

কলঙ্কিত দেহে তব সাবিত্রীর মন
সারানিশি জেগেছিল, করিয়ে প্রতীক্ষা
বিশ্বজয়ী প্রণয়ের, প্রাণ যার পণ ।—
তারি বলে মহ তুমি অগ্নির পরীক্ষা !

পত্রলেখা

অষ্টাদশ বর্ষ দেশে আছ পত্রলেখা !

শুক-মুখে শুনিয়াছি তোমার সন্দেশ ।

তাম্বুল-করঙ্ক করে, রক্ত পট্টবেশ,

প্রগল্ভ বচন, রাজ-অন্তঃপুরে শেখা ॥

কাব্য-রাজ্যে তব সনে নিমেষের দেখা ।

স্বর্ণ-মেখলাস্পর্শী মুক্ত তব কেশ,—

অশ্বপৃষ্ঠে রাজপুত্র যায় দূর দেশ,

অঙ্কে তার আঁকা তুমি বিদ্যুতের রেখা !

চন্দ্রাপীড় মুগ্ধনেত্রে হেরে কাদম্বরী,—

রক্তাম্বরে রাখো তুমি হৃদয় সম্বরী ॥

গিরি পুরী লজ্জি, সিন্ধু কান্তার বিজন,

মনোরথে নীলাম্বরে ভ্রমি যবে একা,—

মম অঙ্কে এসে বস', কবির সৃজন,

তাম্বুল-করঙ্ক করে তুমি পত্রলেখা !

তাজমহল

সাজাহাঁর শুভকীর্তি, অটল সুন্দর !
অক্ষুণ্ণ অজর দেহ মর্ম্মরে রচিত,
নীলা পান্না পোখরাজে অন্তর খচিত ।
তুমি হাস, কোথা আজ দারা সেকন্দর ?

সকলি সদর তব, নাহিক অন্দর,
ব্যক্ত রূপ স্তরে স্তরে রয়েছে সঞ্চিত ।
প্রেমের রহস্যে কিন্তু একান্ত বঞ্চিত,
ছায়ামায়াশূন্য তব হৃদয়-কন্দর !

মুমতাজ ! তাজ নহে বেদনার মূর্তি ।
—শিল্প-সৃষ্টি-আনন্দের অকুণ্ঠিত স্ফূর্তি ॥

আঁখিতে সূর্য্যা-রেখা, অধরে তাম্বুল,
হেনায় রঞ্জিত তব নখাগ্র রাতুল,
জরিতে জড়িত বেণী, রুমালে স্তাম্বুল,—
বাদশার ছিলে তুমি খেলার পুতুল !

বাস্কলার যমুনা

তুমি নহ শ্যামা তব্বী বৃন্দাবন-পাশে,
তীরে যার সারি সারি কদম্ব বকুল,
কৃষ্ণ যেথা বেণুতানে মাতায় গোকুল,
নৃত্য করে লীলাভরে গোপীসনে রাসে ॥

উজান বহ না তুমি চলিয়া বিলাসে,—
স্বমুখে ছুটিয়া চল উদ্যম ব্যাকুল,
মাটি নিয়ে খেলা কর, ভেঙ্গে ছুটি কূল,
সীমায় আবদ্ধ নহ, পরশ' আকাশে !

আরম্ভেতে ব্রহ্মপুত্র, শেষেতে যমুনা ।
সৃষ্টি আর প্রলয়ের দেখাও নমুনা ॥

অহর্নিশি ভাস্কাগড়া, এই তব রীতি,
মুক্তকণ্ঠে গাও তুমি জীবনের গান ।
জগৎ গতির লালা, সৃষ্টিছাড়া স্থিতি ।
বাস্কলার নদী তুমি, বাস্কলার প্রাণ !

BERNARD SHAW

সভ্যতার প্রিয়শত্রু, বার্ণার্ড্ শ,
সমাজের তুমি দেখ শৃঙ্খল আচার,
শিকল-বিকল-মন মানুষ নাচার,
তব শাস্ত্র শুনে তাই তারা হয় থ !

মানুষেতে ভালবাসে হ য ব র ল,
তারি লাগি সয় তারা শত অত্যাচার ।
স্পর্শে বাক্যে প্রাণ পায়, যে করে বিচার,—
অন্যের পায়ের নীচে পড়ে' যায় দ !

মানবের দুঃখে মনে অশ্রুজলে ভাসো,—
অপরে বোঝে না, তাই নাটকেতে হাসো ॥

হয় মোরা মিছে খেটে হই গলদধর্ম,
নয় থাকি বসে, রাখি করেতে চিবুক ।
এ জাতে শেখাতে পারি জীবনের মর্ম,
হাতে যদি পাই আমি তোমার চাবুক !

বালিকা-বধু

বালিকার যত নব যুবা কবিবঁধু,
যুবতী ছাড়িয়ে এবে ভজিছে বালিকা ।
তাদের চাপিয়া ক্ষুদ্র হৃদয়-নালিকা,
চোঁয়াতে প্রয়াস পায় তাজা প্রেম-মধু !

গৌরীদানে লভে কবি কচিখুকি বধু,
কবিহস্তে কিন্তু ত্রাণ পায় না কলিকা ।
কুঁড়ি ছিঁড়ি ভরে তারা কাব্যের ডালিকা,-
দুঃখপোষ্য শিশুদের মুখে যাচে শীধু !

পবিত্র কবিত্বপূর্ণ প্রেমে হ'য়ে ভোর,
বালিকার বিদ্যালয়ে ঢোকে কবি চোর !

বলিহারি কবি-ভর্তা M. A. আর B. A.

বাল-বধু লতিকার ঝুলিবার তরু !

মানুষ মরুক্ সবে গলে রজ্জু দিয়ে,

বেঁচে থাক্ কবিতার যত কাম-গরু !

বন্ধুর প্রতি

বড় সাধ ছিল তব, করে ধরি' বীণ,
বাজাতে অপূৰ্ব রাগ যৌবনের সুরে,
মুমূৰ্ মুমুমু সবে দিয়ে যমপুরে,
তব গীতমন্ত্রে ধরা করিতে নবীন!

কল্পনার ছিল তব চক্ষে দূরবীণ ।

অসীম আকাশদেশে দূর হতে দূরে
খুঁজিতে কোথায় কোন্ নব জ্যোতি স্ফুরে,
যার আলো জয় করে অঁধার প্রবীণ ॥

আবিষ্কার কর নাই কোন নব তারা ।

আজিও ধরণী ধরে পুরাণো চেহারা ॥

আকাশেতে উড়েছিলে রঙীন পতঙ্গ,
পূৰ্বাহ্নেই গেছে তব পাখা দু'টি ঝরে',
সে পক্ষ ধূনন-ধ্বনি আজ গেছে মরে',—
মাটির বুকেতে স্থখে শুয়ে আছে অঙ্গ !

ব্যর্থজীবন

মুখস্থে প্রথম কভু হইনি কেলাসে ।
হৃদয় ভাঙেনি মোর কৈশোর-পরশে ।
কবিতা লিখিনি কভু সাধু-আদিরসে ।
যৌবন-জোয়ারে ভেসে, ডুবিনি বিলাসে
চাটুপটু বক্তা নহি, বড় এজলাসে ।
উদ্ধার করিনি দেশ, টানিয়া চরসে ।
পুত্রকন্যা হয় নাই বরষে বরষে ।
অশ্রুপাত করি নাই মদের গেলাসে !
পয়সা করিনি আমি, পাইনি খেতাব ।
পাঠকের, মুখ চেয়ে লিখিনি কেতাব ॥
অন্যে কভু দিই নাই নীতি-উপদেশ ।
চরিত্রে দৃষ্টান্ত নহি, দেশে কি বিদেশে ।
বুদ্ধি তবু নাই পাকে, পাকে যদি কেশ
তপস্বী হব না আমি জীবনের শেষে !

মানব-সমাজ

ঘরকন্না নিয়ে ব্যস্ত মানব-সমাজ ।

মাটির প্রদীপ জ্বলে সারানিশি জাগে,
ছোট ঘরে ঘোর দিয়ে ছোট স্মৃথ মাগে,
সাধ করে' গায়ে পরে পুতুলের মাজ ॥

কেনা আর বেচা, আর যত নিত্য কাজ,
চিরদিন প্রতিদিন ভাল নাহি লাগে ।
আর কিছু আছে কি না, পরে কিম্বা আগে,
জানিতে বাসনা মোর মনে জাগে আজ ॥

বাহিরের দিকে মন যাহার প্রবণ,—
সে জানে প্রাণের চেয়ে অধিক জীবন ॥

মন তার যায় তাই সীমানা ছাড়িয়ে,
করিতে অজানা দেশ খুঁজে আবিষ্কার ।
দিয়ে কিন্তু মানবের সাম্রাজ্য বাড়িয়ে,
সমাজের তিরস্কার পায় পুরস্কার !

হাসি ও কান্না

সত্য কথা বলি, আমি ভাল নাহি বাসি
দিবানিশি যে নয়ন করে ছলছল,
কথায় কথায় যাহে ভরে আসে জল,—
আমি খুঁজি চোখে চোখে আনন্দের হাসি ॥

আর আমি ভালবাসি বিক্রপের হাসি,
ফোটে যাহা তুচ্ছ করি আঁধারের বল,
উজ্জ্বল চঞ্চল যার নিশ্চয় অনল
দগ্ধ করে পৃথিবীর শুষ্ক ভূগরাশি ॥

হৃদয়ে কৃপণ হ'য়ে ধনী হ'তে চায়,—
সুখ তারা দেয় নাকো, তাই দুঃখ পায় ॥

তাই আমি নাহি করি দুঃখেতে মমতা,
সুখী যারা, তারা মোর মনের মানুষ ।
হাসিতে উড়ায় তারা নিষ্ঠুর ক্ষমতা,
মনে জেনে বিশ্ব শুধু রঙিন ফানুস ॥

ধরণী

কে বলে পৃথিবী এবে হয়েছে প্রাচীন ?
আজিও বসন্তে এসে কোকিল পাপিয়া
মুক্তকণ্ঠে তারস্বরে ডাকে “পিয়া” “পিয়া”,—
বার্দ্ধক্যের পক্ষে সেত নহে সমীচীন !
বার্দ্ধক্যের স্বপ্ন দেখে যত অর্কবাচীন,
যৌবন যাহারা রাখে ভয়েতে চাপিয়া ।
হ্যা দেখ, প্রাণের টানে উঠেছে কাঁপিয়া,
চিরকালে গুলিখোর পাণ্ডুবর্ণ চীন্ !

আকাশে বিদ্যুৎ আজো খেলে তলোয়ার,
চাঁদের চুম্বনে ওঠে সাগরে জোয়ার ।
পূর্ণিমা আজিও ঘুরে আসে পক্ষে পক্ষে,
আজিও প্রকৃতি আছে সবুজ, সৌখীন্,
নরনারী আজো ধরে পরম্পরে বক্ষে,—
অমানুষে পরে শুধু ডোর ও কোপীন্ !

কাঁঠালী চাঁপা

গড়নে গহনা বটে, রঙেতে সবুজ,—
ফুলের সৰ্বণ নহ, বর্ণচোরা চাঁপা !
যথা তব গন্ধভারে গর্ষভরে কাঁপা,
ফিরেও চাহে না তোমা নয়ন অবুঝ ॥

নেত্রধর্ম খুঁজে ফেরা গোলাপ, অশুভ ।
উপেক্ষিতা আছ তুমি, হয়ে পাতা-চাঁপা ।
তোমার কাঁঠালী গন্ধ নাহি রহে ছাঁপা,—
ছুটে আসে, ভেদ করি পাতার গশুভ ॥

ঠিক ক'রে হও নাই পাতা কিম্বা ফুল,—
ছ'মনা করাই তব দুর্গতির মূল !

পত্রের নিয়েছ বর্ণ, ফল হতে গন্ধ,
আকৃতি ফুলের কাছে করিয়াছ ধার,
সর্বধর্মসমন্বয়-লোভে হ'য়ে অন্ধ,—
স্বধর্ম হারিয়ে হ'লে সর্বজাতি বার !

করবী

স্বপ্ত গন্ধ, গুপ্ত বর্ণ তোমার, করবি !
শক্তি-বীজ-মন্ত্র আমি দিয়া তব কানে,
সৌরভ জাগাতে চাহি প্রণয়ের টানে,
গৌরবে তোমায় করি ফুলের ভারবি !

তরুণ অরুণ রাগে রঞ্জিত ভৈরবী,
জীবনের পূর্বরাগ আছে তার গানে ।
সেই রাগ পূর্ণ হয় সারস্বের তানে,
আলিঙ্গন করে যবে মধ্যাহ্নের রবি ॥

পূর্ণস্নেহে জ্বলে যবে জীবনের শিখা,
গাঢ় হ'য়ে ওঠে তবে, ছিল যাহা ফিকা ॥

কত বর্ণ, কত গন্ধ অন্তঃপুরবাসী,
স্বপ্ত রয়েছে আজি কুসুম-শয়নে ।
জাগাতে তাদের নিত্য আমি ভালবাসি,
তন্দ্রাস্থখে আছে যারা মুদিয়া নয়নে ॥

কাঠ-মল্লিকা

তুমি নহ রক্তজবা অথবা পলাশ,
আগুন জ্বালিয়ে বন আলো করে যারা,
—যে দিব্য অনলে পুড়ে কাম অঙ্গহারা,
যে আলো ধরায় করে নকল-কৈলাস !

তুমি নহ মানবের নয়ন-বিলাস,
রতি-ভর তনু তব হিম-বিন্দু পারা,—
গন্ধ তব ভেদ করি শ্যামপত্র-কারা,
মুক্ত হ'য়ে ব্যক্ত করে মন-অভিলাষ ॥

গুপ্ত হয়ে থাক তুমি বন-অন্তঃপুরে ।
মায়া তব গন্ধরূপে ছড়াও সূদূরে ॥

আকাশ দেখনি কভু সুনীল বিপুল,
ঘনচ্ছায় বনে আছ, নেত্র নত করি ।
খুঁজিনি তোমায় আমি গন্ধসূত্র ধরি,
তাই তুমি মোর চির আকাশের ফুল !

রজনীগন্ধা

রাত্রি হাতে মঁপে দেয় দিবা যবে সন্ধ্যা,
পরায়ে তাহার অঙ্গ গাঢ় লাল আলো,
—নিশা যারে ক্রোড়ে ধরে দিয়া বাহু কালো—
সেই লগ্নে ফোটো তুমি, রে রজনীগন্ধা !

রাত্রির পরশে যবে পৃথ্বী হ'য়ে বন্ধ্যা,
না পারে ফুটাতে ফুল রূপে জন্মকালো,
তুমি সেই অবসরে বুক খুলে ঢালো,
গোপনে সঞ্চিত গন্ধ, লো রজনীগন্ধা !

দিবসের প্রলোভনে তুমি নহ বশ্যা ।
হৃদয় তোমার তাই অসূর্য্যম্পশ্যা ॥

আমার আসিবে যবে জীবনের সন্ধ্যা,
দিবসের আলো যবে ক্রমে হবে ঘোর,
কানেতে পশিবে নাকো পৃথিবীর সোর,—
মোর পাশে ফোটো তুমি, হে রজনীগন্ধা !

গোলাপ

রূপে গন্ধে যানি তুমি জগতে অতুল,
পূজায় লাগো না কিন্তু, অনাৰ্য্য গোলাপ !
দেমাকে দেবতাসনে করোনা আলাপ,—
ফুলের নবাব তুমি, নবাবের ফুল !

ইরাণের ভগ্নোচ্চানে বসি বুলবুল,
স্মরিয়া স্মরিয়া তোমা করিছে বিলাপ ।
তুমি কিন্তু রমণীর কেশের কলাপ
আলো করে' বসো, কিম্বা কর্ণে হও ছল ॥

সোহাগে গলিয়া তুমি হও বা আতর,
শুশ্ফাসনে বসে' কর বেগম কাতর !

বিলাসের অঙ্গ লাগি তুমি হও জল,
নারীর আঁচুরে ফুল, সৌখীন গোলাপ !
নবাবেরই ভোগ্য তব রূপগুণবল,
নবাবের যোগ্য তুমি হকিমী জোলাপ !

ধুতুরার ফুল

ভাল আমি নাহি বাসি নামজাদা ফুল,—
নারীর আদর পেয়ে যারা হয় ধন্য,
ফুলের বাজারে যারা হইয়াছে পণ্য,
কবির যাদের নিয়ে করে হুলস্থূল ।
বিলাসীর কিন্তু যারা অতি চক্ষুশূল,
রূপে গন্ধে ফুল মাঝে যাহারা নগণ্য,
বসন্ত কি কন্দর্পের যারা নয় সৈন্য,
যার দিকে কভু নাহি ঝাঁকে অলিকূল,—
আমি খুঁজি সেই ফুল, হইয়া বিহ্বল,
যাহার অন্তরে আছে গন্ধ-হলাহল ।
নয়নের পাতে যার আছে ঘুমঘোর,
চির দিবাস্রপ্তে যারা আছে মশ্গুল,
তাদের নেশায় আমি হতে চাই ভোর,—
ভালবাসি তাই আমি ধুতুরার ফুল ॥

অপরাহ্ন

গোলাপ, গোলাপ, শুধু গোলাপের রাশি !

গোলাপের রং ছিল অনন্ত আকাশে,
গোলাপের গন্ধ ছিল ধরাতে বাতাসে,
নারীর অধরে ছিল গোলাপের হাসি ॥

রং এবে গেছে জ্বলে', গন্ধ হ'ল বাসি ।
শুখানো পাতার রাশি ওড়ে চারিপাশে,
বসন্ত নিদাঘে পুড়ে ছাই হ'য়ে আসে,
পৃথিবীতে মনে হয় হয়েছি প্রবাসী ॥

অলক্ষিতে খসে' গেছে মায়া-রত্নচুলি ।
এ বিশ্ব মাটির গড়া, দেখি চক্ষু খুলি ॥

আশার গোলাপী নেশা গিয়াছে ছুটিয়া,
যে নেত্রে আদর ছিল, হেরি অবহেলা ।
যৌবনের স্বর্ণপুরী গিয়াছে টুটিয়া,—
মহাশূন্য মাঝে আজি করি ধূলাখেলা ॥

ব্যর্থ বৈরাগ্য

এসেছে নূতন দিন, ধরি যোগীবেশ ।
কালকের ফুল যত গিয়েছে শুকিয়ে,
কালকের ভুল যত গিয়েছে চুকিয়ে,
আগেকার জীবনের পালা হ'ল শেষ ॥

ঝরা-ফুলে ভরা বিশ্ব, গন্ধ নাহি লেশ ।
জীবনের বেশিভাগ দিয়েছি ফুঁকিয়ে,
বাকিটুকু মৃত্যুপানে পড়েছে ঝুঁকিয়ে,
যে সুর বাজিত কানে, নাহি তার রেশ ॥

জীবনের স্রোত চলে দক্ষিণবাহিনী ।
উত্তরে পড়িয়া থাকে পূর্বের কাহিনী ॥

উপরে উঠিছে ভাসি নব ভয় আশা,
বিরাম মানে না স্রোত, বহে খরধার ।
আবার ফেলিতে হবে জীবনের পাশা,—
খেলা নিয়ে কথা শুধু, মিছে জিত হার !

অন্বেষণ

আজিও জানিনে আমি হেথায় কি চাই !

কখনো রূপেতে খুঁজি নয়ন-উৎসব,

পিপাসা মিটাতে চাই ফুলের আসব,

কভু বসি যোগাসনে, অঙ্গে মেখে ছাই ॥

কখনো বিজ্ঞানে করি প্রকৃতি যাচাই,

খুঁজি তারে যার গর্ভে জগৎ প্রসব,

পূজা করি নির্বিচারে শিব কি কেশব,—

আজিও জানিনে আমি তাহে কিবা পাই ॥

রূপের মাঝারে চাহি অরূপ দর্শন ।

অঙ্গের মাঝারে মাগি অনঙ্গস্পর্শন ॥

খোঁজা জানি নষ্ট করা সময় বৃথায়,—

দূর তবে কাছে আসে, কাছে যবে দূর ।

বিশ্রাম পায় না মন পরের কথায়,

অবিশ্রান্ত খুঁজি তাই অনাহত-মূর ॥

আত্মপ্রকাশ

প্রকৃতিরই অংশে গড়া আমাদের মন ।
বিশ্বছবি দেখি স্পষ্ট রহিয়াছে আঁকা,
বিশ্বের হৃদয় কিন্তু বিশ্বদেহে ঢাকা,
আভাসে প্রকাশ তার, আসল গোপন ॥

সবারই অন্তরে আছে গুপ্ত নিকেতন,
মনোপাখী সুপ্ত যাহে, গুটাইয়া পাখা ।
সে নিদ্রা যোগীরা জানে পূর্ণ জেগে থাকা,—
খুলে বলা বৃথা চেষ্টা তাহার স্বপন ॥

অন্তরের রহস্যের সঠিক বারতা
কথায় প্রকাশ পায়, এটি মিছে কথা ॥

ভাষায় যা'-কিছু ধরি, উপরেই ভাসে,
স্বেচ্ছায় ক'রেছে যাহা আলোক বরণ ।
সত্য কিন্তু তারি নীচে মুখ ঢেকে হাসে,—
কভু নাহি দেখা দেয় বিনা আবরণ ॥

বিশ্বরূপ

কে জানে কাহার বিশ্ব,—দৃশ্য চমৎকার !
আলোকে আঁধারে এই খোলা আর মেলা,
জড়তে চৈতন্যে এই লুকোচুরি খেলা,
তারি মাঝে মূল তানে ওঠে ঝনৎকার ॥

দেখে শুনে হতবুদ্ধি আমি সনৎকার !
সুনীল আকাশ-সিন্ধু, কোথা তার বেলা,
সারি সারি ভাসে তারা, জ্যোতিষ্কের ভেলা,
কোথা যায় নাহি জানি, নহি গগৎকার !

বিশ্বটানে মন যায় বিশ্বেতে ছড়িয়ে ।
অন্তর থাকিতে চায় বাহিরে জড়িয়ে ॥

আমি চাই টেনে নিয়ে ছড়ানো প্রক্ষিপ্ত,
অন্তরে সঞ্চিত করি আঁধার আলোক,
প্রতীক রচনা করি চিত্রিত সংক্ষিপ্ত,—
চতুর্দশ পদে বদ্ধ চতুর্দশ লোক !

শিব

রজতগিরিতে হেরি তব শুভ্রকায়া,
চন্দ্র তব ললাটের চাকু আভরণ,
তব কণ্ঠে ঘনীভূত সিন্ধুর বরণ,—
বিশ্বরূপ জানি আমি তব দৃশ্য মায়া ॥

যার স্ফূর্তি চরাচর, সে ত তব জায়া ।
নিজদেহে করিয়াছ বিশ্ব আহরণ,
তাই হেরি কৃতি তব চিত্র-আবরণ,—
জীবনের আলোশ্লিষ্ট মরণের ছায়া !

তোমার দর্শন পাই মূর্তিমান মন্ত্রে,
যজ্ঞসূত্রে বাঁধা যাহা হৃদয়ের তন্ত্রে ॥

সেই রূপ রেখো দেব ভরিয়া নয়নে,—
শিবমূর্তি হেরি বিশ্ব, দেহ এ ক্ষমতা ।
ধরিতে পারি না আমি নেত্রে কিন্ধা মনে,
আকারবিহীন কোন বিশ্বের দেবতা ॥

বিশ্ব-ব্যাকরণ

বিজ্ঞান রচেছে নব বিশ্ব-ব্যাকরণ ।

ক্রিয়া কিস্বা কৰ্ম নাই, শেখায় বেদান্ত,—

ক্রিয়া আছে, কৰ্তা নাই, বিজ্ঞান-সিদ্ধান্ত,

আগাগোড়া কৰ্ম শুধু, নাহিক করণ ॥

সকলি বিশেষ্য, কিস্বা সবই বিশেষণ,

এই নিয়ে দ্বন্দ্ব নিত্য, লড়াই প্রাণান্ত !

সন্ধি কি সমাস সৃষ্টি, সমস্তা একান্ত,—

মীমাংসা করিতে চাই ধাতু-বিশ্লেষণ ॥

সৰ্বনাম রূপ আছে, নাহিক অব্যয় ।

কেবল বচনে হয় সৃষ্টির অন্বয় ॥

প্রকৃতির সূত্র আছে, নাই অভিধান,

জড় করে' তাই জ্ঞানী রচে মুগ্ধবোধ ।

পণ্ডিতের পক্ষে তারই মুখস্থ বিধান,—

আমরা নির্বোধ, তাই চাই অর্থবোধ !

বিশ্বকোষ

বিশ্বের সবাই মোরা পাঠকপাঠিকা ।
পাতা তার খোলা আছে ঠিক মাঝখানে,
দেখামাত্র বুঝি মোরা স্পর্শ তার মানে,
বাজে কাজ করা তার আছোপান্ত টীকা ॥

ধরণীকে চূর্ণ করি, জ্ঞানের বটিকা
গড়ে কিন্তু তিতো করে' দর্শনে বিজ্ঞানে,
সে গুলি মূর্খেতে গেলে, বুজে চোখ কানে,—
জানেনা তাহার মূল্য নয় বরাটিকা !

বিশ্বসনে দিনরাত শুধু বোঝাপড়া,
সে ত নয় ঘর করা, করা সে ঝগড়া !

নয়নেতে আছে আলো, মনে ভালবাসা,
অন্ধকার জীবনের অপর পৃষ্ঠেতে ।
সুখ দুঃখ দুই কহে প্রণয়ের ভাষা,—
সে ভাষা না বুঝে, খোঁজো মানে অদৃষ্টেতে ॥

সুরা

সুরার সুরত্ব জানি আমি আর তুমি !
সুরা-তৈলে মনোবাতি ছড়ায় আলোক,
মনের মন্দিরে বাজে মন্দিরা ঢোলক,—
একথা ওমার জানে, হাফিজ্ আর রুমি ॥

রাত্রি বাড়ে, মাত্রা চড়ে, পাত্রাধর চুমি ।
আকাশেতে চাঁদ ঝোলে, আলোর গোলক,
নীলাশ্বরী-আড়ে দোলে মোতির নোলক,
শূন্যে উড়ে তাই ধরি, শয্যা শেষে ভূমি !

জড়েতে চৈতন্যরূপী তরল আগুন,
তোমার পরশে মাঘ গলিয়া ফাগুন !

হাবুডুবু খাই সবে ভবসিন্ধু-নীরে,
টোকে টোকে পেটে টোকে লবণ তরল ।
সুরাসুরে তাই মথি তুলিয়াছে তীরে,
প্রকৃতির খাঁটি রস, অমৃত-গরল !

রূপক

কখনো অন্তরে নোর গভীর বিরাগ,
হেমন্তের রাত্রিহেন থাকে গো জড়িয়ে,
—যাহার সর্বাস্থে যায় নীরবে ছড়িয়ে
কামিনী ফুলের শুভ্র অতনু পরাগ ॥

বাসনা যখন করে হৃদয় সরাগ,
শিশিরে হারানো বর্ণ, লীলায় কুড়িয়ে,
চিদাকাশে দেয় ছেলে, বসন্ত গড়িয়ে
কাঞ্চন ফুলের রক্ত চঞ্চল চিরাগ ॥

কভু টানি, কভু ছাড়ি, মনের নিঃশ্বাস ।
পক্ষে পক্ষে ঘুরে আসে সংশয় বিশ্বাস ॥

বসন্তের দিবা, আর হেমন্ত-যামিনী,
উভয়ের ঘন্থে মেলে জীবনের ছন্দ ।
দিবাগাত্রে রঙ আছে, নিশাবক্ষে গন্ধ,—
সৃষ্টির সংক্ষিপ্ত সার কাঞ্চন কামিনী ॥

একদিন

একদিন একা বসি, শিরে রাখি কর,
একমনে করি যবে কবিতা বয়ন,
শব্দের কুসুম করি স্মৃতিতে চয়ন,—
সহসা ফুলের গন্ধে ভরে' গেল ঘর ।
তখন ছিল না কিছু ইন্দ্রিয়গোচর,
স্বপ্ত ভাব, ত্যজি মোর হৃদয়-শয়ন,
উঠেছিল সেই ক্ষণে মেলিয়া নয়ন,—
ফুলের নিঃশ্বাস প'ল চুলের উপর ॥

লিখিয়াছি সবে যবে দুই চার ছত্র,
নীলাঙ্ক আভায় হ'ল সুরঞ্জিত পত্র ।
শেষে যেই মিলে গেল অন্তিম চরণ,
অধরে মিলিল এসে ফুলের অধর,
চোখেতে ফুলের হেরি রক্তিমবরণ,
কাণে শুনি প্রিয়া-কণ্ঠ-গলিত আদর !

ভুল

ভাল তোমা বেসেছিঁনু, মিছে কথা নয় ।

যেদিন একেলা তুমি ছিলে মোর সাথী,

বকুলের তলে বসি, মনে মন গাঁথি ।

—বকুলের গন্ধ বল কতদিন রয় ?

সেদিন পৃথিবী ছিল অন্ধকারময়,

বন মেঘে ঢেকেছিল নক্ষত্রের বাতি,

সে তিমির চিরেছিল বিদ্যুৎ-করাতি ।

—বিদ্যুতের আলো কিন্তু কতক্ষণ রয় ?

স্বপ্ন মোরা ভুলে যাই নিদ্রা গেলে টুটে,

শাদা চোখে সব দেখি নেশা গেলে ছুটে ॥

নিভানো আগুন জানি জ্বলিবে না আর,

মনে কিন্তু থেকে যায় স্মৃতিরেখা তার,—

হৃদিলগ্ন আমরণ পারিজাত-হার ।

হৃদয়ের ভুল শুধু জীবনের সার !

হাসি

যতই দিই না আমি হাসিতে উড়িয়ে,
সমাজের সংসারের অন্ধ ক্রুর বল,—
সে ত শুধু খেলামাত্র, শুধু বাক্‌ছল,
এখনো যায়নি প্রাণ একান্ত জুড়িয়ে ॥

নয়ন যখন দিই হাসিতে মুড়িয়ে,
লুকিয়ে তাহার নীচে থাকে অশ্রুজল ।
বৃথা কাজ ! জীবনের প্রতি ব্যর্থ পল
স্মৃতিতে একত্র করা, অতীতে কুড়িয়ে ॥

জেনে শুনে ছুটি মোরা আলেয়ার পিছে,
সে আলো নিভিলে তাই কান্নাকাটি মিছে ॥

জীবনের দিবসের স্বপ্ন পরিসর,
ঘিরে তারে আছে ঘন অনন্তের ছায়া ।
যদিচ ধরেছি সবে দু'দিনের কায়া,—
হাসির, কাজের, তবু আছে অবসর ॥

রোগ-শয্যা

যখনি চেয়েছি আমি, পরি বীরসজ্জা,
কাম্যরাজ্য-বিজয়ের ধরি দৃপ্ত আশা,
দ্রুতবেগে যাই লঙ্ঘি শতদ্রু বিপাশা,—
তখনি পেয়েছি আমি শুধু রোগশয্যা ॥

ব্যথায় ভরিয়া ওঠে মম অস্থি মজ্জা,
সর্বাস্থের মুখে ফোটে ব্যর্থ আৰ্ত্তভাষা,
সঙ্কল্পের ধ্বংস করে দেহ কস্মনাশা,
রোগেতে লাক্ষিত হ'য়ে মন মানে লজ্জা ॥

দেহের আশ্রয়ে থাকি দিন দুই চার,
তাই সই তার নীচ অন্ধ অত্যাচার ॥

দেহের পীড়নে মনে আসে না বিকার,
শয্যাপ্রান্তে পাত্রপূর্ণ আছে ভালবাসা,
যাহাতে মিটাই তীব্র রোগীর পিপাসা,—
সে স্খার লাগি করি রোগের স্বীকার ॥

মুঞ্চিল-আশান

ছেলেবেলা একদিন প্রতিমা-ভাসান
একেলা দেখিতে যাই, ঘর ছেড়ে দূরে ।
পথ ভুলে রাত্রিবেলা মরি ঘুরে ঘুরে,
ভয়েতে বিহ্বল দেখি স্মুখে শ্মশান !
অন্ধকারে ঘুরে ঘুরে হই পরিশান,
কাঁপে বুক, বারে আঁখি, বাক্য নাহি স্ফুরে ।
সহসা মশাল হাতে, ভিখারীর সুরে,
পথিক আসিল হাঁকি “মুঞ্চিল-আশান” !
তস্বীর মালা হাতে, গায়ে আলখাল্লা,
মুখেতে মুখস্থ বুলি “লা-আল্লা-ইলাল্লা !”

আজিও নিরাশা বৃকে চাপালে পাষাণ,
কানেতে না পশে মোর দুনিয়ার হাল্লা ।
হৃদয়-ফকির জপে “লা-আল্লা-ইলাল্লা”,
আকাশেতে শুনি বাণী “মুঞ্চিল-আশান” !

বাহার

নটীবেশে তুমি এস, রাগিণী বাহার !
অঙ্গরাগ ধরি নব উজ্জ্বল শ্যামল,
মালতীর মালা চূলে, করেতে কমল,
চরণে তাড়না করি শীতের নীহার ॥

বিলাসী পবন সনে উদ্যানবিহার
কর তুমি, অঙ্গে মাখি মল্লি-পরিমল ।
নেত্রপুটে ধরি' আভা কৌমুদী-কোমল,
ধরায় সলীল সুর দাও উপহার ॥

তোমার পাপিয়াকণ্ঠ কাঁপিয়ে কাঁপিয়ে,
বসন্তের তানে দাও দিগন্ত ছাপিয়ে ॥

স্বরে গেঁথে সাত-ন'র বৈজয়ন্তী-হার,
ঝুলিয়ে ছুলিয়ে দাও আকাশের গলে !
শোক দুঃখ ভয় বাধা করি' পরিহার,
উঠুক প্রাণের দীপ মুহূর্তেক জ্বলে' ॥

পূরবী

সন্ধ্যার ছায়ায় লীন, মলিন পূরবী !
বিষাদ তোমার চোখে, অবসাদ প্রাণে ।
মগ্ন তুমি হ'য়ে আছ সূর্যাস্তের ধ্যানে,
ধূম্র তব কেশপাশে ধূপের সুরভি ।
উদাসিনী তুমি, নও করুণ ভৈরবী,
উন্মনা তোমার গানে, মনে সন্ধ্যা আনে ।
আঁখি খোঁজে শেষ আলো অস্তাচলপানে,
লেখে যথা চিত্রস্বর্গে, হরফে আরবী,
সূর্য তার রূপকথা ; পড়িতে না জানি,
নিশায় মিলিত দিবা স্বপ্ন হেন মানি ।
শ্রান্তিভরা শান্তি আছে তব শ্লথ সুরে,
উদাসিনি ! তব মন্ত্রে হ'য়েছি উদাস ।
তোমার প্রণয়ী ছিল কবি নিশাপুরে,
হে পূরবী ! কর মোরে তব সুরদাস ॥

শিখা ও ফুল

সতৃষ্ণ রসনা মেলি মনের পাবক,
মনোজবা রূপ ধরি ওঠে যবে হাসি,
—গলিত লোহিত ক্ষুর প্রবালের রাশি,—
সে শিখা পরায় তব চরণে যাবক ॥

তুমারে গঠিত ফুল, স্তবকে স্তবক,
মনোমাঝে জাগে যবে শুভ্র হাসি হাসি,
সে ফুলে অঞ্জলি ভরে' দিই রাশি রাশি,
যুধি জাতি শেফালিকা কুন্দ কুরুবক ॥

তুমি চাহ রূপস্পর্শ উল্ট বিলকুল,—
ফুলের আগুন, কিম্বা আগুনের ফুল ॥

আমি কিন্তু করে' যাব কুসুমের চাষ,
যতদিন এ হৃদয় না হয় উষর ।

জ্বলে রাখি বহি জবাকুসুমসঙ্কাশ,—
যে বহি নিভিলে হয় জগৎ ধূসর !

গজল

নয়ন-গোলাপ তব করিতে উজ্জ্বল,
বুল্বুলের সুরে আজি বেঁধেছি সেতার ।
গাহিব প্রেমের গান পারসী কেতার,
ফুলের মতন লঘু রঙিলা গজল !

যে সুর পশিয়া কানে চোখে আনে জল,
সে সুর বিবাদী জেনো মোর কবিতার ।
মম গীতে নত তব চোখের পাতার
সামান্তে রচিয়া দিব দু'ছত্র কাজল !

বাজিয়ে দেখেছি ঢের বীণ ও রবাব,
পাইনি সে সুরে তব প্রাণের জবাব ॥

আজ তাই ছাড়ি যত ধ্রুপদ ধামার,
চুটকিতে রাখি সব আশা ভালবাসা ।
দরদ ঈষৎ আছে এ গীতে আমার,—
সুরে ভাবে মিল আছে, দুই ভাসা ভাসা !

পাষণী

কত না ক'রেছি আমি তোমায় আদর,
চঞ্চল হয়নি তব নয়ন-কুরঙ্গ ।
স্ববর্ণ কঠিন তব হৃদয়-নারঙ্গ,
খোলনি সরিয়ে কভু বুকের চাদর ॥

যৌবনে আসেনি তব শ্রাবণ ভাদর,
ছাপিয়ে ওঠেনি বুকে বাসনা-তরঙ্গ ।
মেঘ-রাগে বাঁধো নাই হৃদয়-সারঙ্গ,
তব মন নাহি জানে বিদ্যুৎ বাদর ॥

তব প্রাণে ভালবাসা র'য়েছে ঘুমিয়ে,
জাগাতে পারিনি আমি হাজার চুমিয়ে !

বিরহে মিলনে কিম্বা হওনা কাতর,
তোমার অন্তরে নাই রক্ততপ্ত রতি ।
দেবীর প্রতিমা তুমি, কেবল পাথর,—
মনো-দীপে এবে করি তোমার আরতি ॥

প্রিয়া

কারো প্রিয়া স্থললিত সারিগান গেয়ে,
—রক্তিম-কপোল উষা জাগে যবে হেসে,—
রূপোর চে'য়ের পরে তালে তালে ভেসে,
দক্ষিণ পবন সনে আসে তরী বেয়ে ॥

কারো প্রিয়া মেঘসম চতুর্দিক ছেয়ে,
অকালের প্রলয়ের অমানিশা বেশে,
দূরন্ত পবনে ক্ষিপ্ত ঘনকৃষ্ণ কেশে,
প্রচণ্ড ঝড়ের মত আসে বেগে ধেয়ে ॥

তুমি প্রিয়ে এ হৃদয়ে পশি ধীরে ধীরে,
বহিছ প্রাণের মত প্রতি শিরে শিরে ।
প্রচ্ছন্ন রূপেতে আছ আচ্ছন্ন করিয়া
আমার সকল অঙ্গ, সকল অন্তর ।
সকল ইন্দ্রিয় মোর জ্যোতিতে ভরিয়া,
যোগাও প্রাণের মূলে রস নিরন্তর ॥

পরিচয়

দেখেছি তোমায় কোন মাধবী পার্বণে,
প্রকৃতির ঐশ্বৰ্য্যের সৌন্দৰ্য্যের সার !
এসেছিলে ধরে' রূপ প্রতিমা উষার,
গন্ধৰ্বশালায় কিম্বা আলেখ্য-ভবনে ॥

মেঘাচ্ছন্ন কোন দূর অতীত শ্রাবণে,
এসেছিলে কাছে কিম্বা, করি অভিসার,
আঁধারের মাঝে করি রূপের প্রসার,
গগন-সীমান্তে কোন বিস্মৃত ভুবনে !

তোমা সনে ছিল জানি পূৰ্ব-পরিচয়,—
মন কিন্তু যুগস্মৃতি করে না সঞ্চয় ॥

ভাসিয়া চলেছি দৌহে হাতে হাত ধরে',
ছাড়াছাড়ি হবে কি গো, পাব যবে কূল ?
অথবা মিলন হ'লে জীবনের পরে,
চিনিতে আবার হবে পরস্পরে ভুল ?

ফুলের ঘুম

বরফ ঢাকিয়াছিল ধরণীর বুক
অথগু শীতল শুভ্র চাদর পরিয়ে ।
রাশি রাশি চন্দ্রালোক নিঃশব্দে ঝরিয়ে,
আপাণ্ডুর করে' ছিল নীলিমার মুখ ॥

সেদিন ছিল না ফুটে শিরীষ কিংশুক,
গিয়েছিল বর্ণ গন্ধ সকলি মরিয়ে ।
তুষারের জটাভার শিরেতে ধরিয়ে
বৃক্ষলতা সমাধিস্থ ছিল হয়ে মুক ॥

পাতার মর্ম্মর আর জল-কলরব,
হিমের শাসনে ছিল নিস্তব্ধ নীরব ॥

পৃথিবীর বুক হতে তুষার সরিয়ে
সেদিন দেখিনি আমি, কোথায় গোপনে,
স্বপ্নে ফুলেরা সবে নয়ন ভরিয়ে
রেখেছিল বসন্তের রক্তিম স্বপনে !

স্মৃতি

কত দিন কত দেশে কতশত ভোরে,
অসংখ্য ফুলেতে ভরা কত ফুলবনে,
ফিরেছি অলসভাবে, একা, আনমনে,—
তুলিনি পূজার লাগি কিন্তু সাজি ভরে' ॥

কত দিন কত দেশে সারানিশি ধরে',
থেকেছি বসিয়া আমি মন্দিরের কোণে,
স্নিগ্ধদৃষ্টি কতশত দেবতার সনে,—
করিনি প্রণাম কিন্তু জুড়ি' দুই করে ॥

আগে শুধু করে' গেছি এই সব ভুল ।
এখন দেবতা কোথা, কোথা সেই ফুল !

আজি সে ফুলের গন্ধ রয়েছে সঞ্চিত
অস্পষ্ট স্মৃতির মত, সব মন ছেয়ে ।
দেবতার স্থিরনেত্র, পূর্বেপরিচিত,
রত্নদীপ-শিখা সম, দূরে আছে চেয়ে !

প্রতিমা

প্রতিমা গড়েছি আমি প্রাণপণ করে ।
আঁধারে আবৃত কত খুঁজে গুপ্ত খনি,
এনেছি তারার মত জ্যোতির্ময় মণি,—
রত্ন দিয়ে দেবীমূর্তি গড়িবার তরে ।
স্ফটিকে গড়েছি অঙ্গ নিশিদিন ধরে,
পরায়েছি শ্যামশাটী মরকতে বুনি,
রক্তবিন্দু পারা দুটি স্নলোহিত চুনি
বিন্যস্ত করেছি আমি দেবীর অধরে ॥

প্রজ্জ্বলিত ইন্দ্রনীলে খচিত নয়ন,
প্রান্তে লগ্ন প্রবালেতে গঠিত শ্রবণ,
মুকুতা-নির্মিত যুগ্ম ঘন-পীন-স্তন,
সুকঠিন পদ্মরাগে গঠিত চরণ ।
অপূর্ব সুন্দর মূর্তি, কিন্তু অচেতন,—
না পারি পূজিতে কিম্বা দিতে বিসর্জন !

উপদেশ

প্রিয় কবি হ'তে চাও, লেখো ভালবাসা,
যা' পড়ে' গলিয়া যাবে পাঠকের মন ।
তার লাগি চাই কিন্তু দু'টি আয়োজন,—
জোর-করা ভাব, আর ধার-করা ভাষা !

বড় কবি কিম্বা হ'তে যদি তব আশা,
ভাবুক বলিবে তোমা জন-সাধারণ,
শেখো যদি সমাজের, করি প্রাণপণ,—
দরকারি ভাব, আর সরকারি ভাষা !

যত যাবে মাটি আর খাঁটিকে ছাড়িয়ে,
শূন্যে শূন্যে মূল্য তব যাইবে বাড়িয়ে ॥

কবিতার জন্মস্থান কল্পনার দেশ,
সে দেশ জানেনা কিন্তু মোদের ভূগোল,—
সত্যের সেখানে নেই কোন গণ্ডগোল,
দেহ নেই সেই দেশে, শুধু আছে বেশ !

স্বপ্ন-লক্ষা

স্বপ্নলোকে আছে মোর স্বর্ণপুরী লক্ষা,
যেথা বাজে মির্গেল, ডান ও ঘাগর ।
শিখি নাই এক লক্ষ্যে লজ্জিতে সাগর,—
সেতুর বন্ধন করি, নাই হেন টঙ্কা !

সে রাজ্যে সজোরে বাজে অনঙ্গের ডঙ্কা,
কঙ্কাবতী যেথা মেলি নয়ন ডাগর,
মোর পথ চেয়ে করে বাসর জাগর,—
স্বপ্নে আমি যাই সেথা, নাহি করি শঙ্কা ॥

লীন হ'য়ে প্রিয়া-অঙ্কে, স্বর্ণ পালঙ্কে,
কলঙ্কের মত রই জড়িয়ে শশাঙ্কে !

মিলনের অহঙ্কারে সালঙ্কারা কঙ্কা,
নূপুরে কঙ্কনে তোলে বীণার ঝঙ্কার,
রশনায় দেয় মুহু বিজয়-টঙ্কার,—
সে শব্দে চমকি জাগি, হেরি নবডঙ্কা !

আত্মকথা

কবিতা আমার জানি, যেমন শঙ্কর,
দু'দিনে সবাই যাবে বেবাক্ ভুলিয়ে !
কল্পনা রাখিনে আমি আকাশে তুলিয়ে,—
নাহি কবি ধূমপায়ী, নলে ত্রিবঙ্কর ॥

হৃদয়ে জন্মিলে মোর ভাবের অঙ্কুর,
ওঠে না তাহার ফুল শূন্যেতে তুলিয়ে ।
প্রিয়া মোর নারী শুধু, থাকেনা বুলিয়ে,
স্বর্গ-মর্ত্য-মাঝখানে, মত ত্রিশঙ্কর !

নাহি জানি অশরীরী মনের স্পন্দন,—
আমার হৃদয় যাচে বাহুর বন্ধন ॥

কবিতার যত সব লাল-নীল ফুল,
মনের আকাশে আমি সযত্নে ফোটাই,
তাদের সবারি বন্ধ পৃথিবীতে মূল,—
মনোঘুড়ি বুঁদ হ'লে ছাড়িনে লাটাই !

সূচী

১ সনেট	২৬ আত্ম-প্রকাশ
২ ভাষ	২৭ বিশ্বরূপ
৩ জয়দেব	২৮ শিব
৪ ভক্তহরি	২৯ বিশ্ব-ব্যাকরণ
৫ চোরকবি	৩০ বিশ্ব-কোষ
৬ বসন্তসেনা	৩১ সুরা
৭ পত্রলেখা	৩২ রূপক
৮ তাজমহল	৩৩ একদিন
৯ বাঙ্গলার যমুনা	৩৪ ভুল
১০ Bernard Shaw	৩৫ হাসি
১১ বালিকা-বধু	৩৬ রোগ-শয্যা
১২ বন্ধুর প্রতি	৩৭ মুক্তি-আশান্
১৩ ব্যর্থ-জীবন	৩৮ বাহার
১৪ মানব সমাজ	৩৯ পূরবী
১৫ হাসি ও কান্না	৪০ শিখা ও ফুল
১৬ ধরনী	৪১ গজল
১৭ কাঁঠালি চাঁপা	৪২ পাষাণী
১৮ করবী	৪৩ প্রিয়া
১৯ কাঠমল্লিকা	৪৪ পরিচয়
২০ রজনীগন্ধা	৪৫ ফুলের ঘুম
২১ গোলাপ	৪৬ স্মৃতি
২২ ধুতুরার ফুল	৪৭ প্রতিমা
২৩ অপরাহ্ন	৪৮ উপদেশ
২৪ ব্যর্থ বৈরাগ্য	৪৯ স্বপ্ন-লক্ষা
২৫ অধৈর্য	৫০ আত্ম-কথা

